



Visoko sudsko i tužilačko vijeće Bosne i Hercegovine
 Visoko sudbeno i tužiteljsko vijeće Bosne i Hercegovine
 Високи судски и тужилачки савет Босне и Херцеговине
 High Judicial and Prosecutorial Council of Bosnia and Herzegovina

Milorad Novković
**Predsjednik Visokog
 sudskog i tužilačkog vijeća**

Sarajevo, 17.4.2009. godine

Parlamentarna skupština Bosne Hercegovine
 Predstavnički dom

G-din Beriz Belkić, Predsjedavajući Predstavničkog doma Bosne i Hercegovine

Predmet: Odgovor na poslaničko pitanje, Veza: vaš broj 01-50-1-15-48/09

VSTV-02- 0956-17042009

PRIMLJENO: 17.4.2009.			
Organizaciona jedinica	Klasifikaciona oznaka	Redni broj	Broj priloga
01-50-1-15-48/09			

Poštovani gospodine Belkiću,

Pismom od 25.3.2009. godine, obratili ste se Visokom sudskom i tužilačkom vijeću Bosne i Hercegovine (u daljem tekstu: Vijeće) sa zahtjevom za odgovor na pitanje koje je postavio poslanik Niko Lozančić na 48. sjednici, održanoj 18. marta 2009. godine, koje glasi:

Kako i temeljem kojih propisa i kriterija su sa svih čelnih pozicija u sudovima i tužilaštvima BiH i entiteta isključeni kadrovi hrvatske nacionalnosti, te kakva je uopće nacionalna struktura svih sudova i tužilaštava u BiH, uključujući općinske, kantonalne, okružne, entitetske, Sud i Tužilaštvo BiH i da li je ta struktura u skladu sa Ustavom BiH?

U vezi sa postavljenim pitanjima, želimo da Vas informišemo slijedeće:

Prilikom imenovanja na sve pravosudne pozicije u Bosni i Hercegovini, Vijeće naročito vodi računa da budu ispoštovane odgovarajuće ustavne odredbe kojima se uređuje princip proporcionalne zastupljenosti konstitutivnih naroda i ostalih. Prije svakog imenovanja, nadležna tijela Vijeća analiziraju nacionalnu strukturu u određenom sudu ili tužilaštvu u svjetlu rezultata popisa stanovništva iz 1991. godine, a kriterij proporcionalne zastupljenosti uzima se kao jedan od glavnih kriterija prilikom imenovanja sudija i tužilaca.

Prema propisima koji se odnose na Sud i Tužilaštvo BiH, nema izričite odredbe koja se odnosi na proporcionalnu zastupljenost konstitutivnih naroda i ostalih. Međutim, Vijeće je vodilo i dalje vodi računa, da prilikom svakog pojedinačnog imenovanja na poziciju sudije ili tužioca u Sudu BiH i Tužilaštvu BiH, konstitutivni narodi i pripadnici ostalih budu zastupljeni na način da nacionalna pripadnost u ovim institucijama odražava popis stanovništva iz 1991. godine na nivou Bosne i Hercegovine.

Što se tiče rukovodnih pozicija, Vijeće je takođe zauzelo stav da pozicije predsjednika Suda i glavnog tužioca Tužilaštva BiH, ne mogu biti popunjene pripadnikom istog konstitutivnog naroda ili iz reda ostalih.

Tako, trenutno poziciju predsjednika Suda BiH obavlja sudija iz reda bošnjačkog naroda, a poziciju glavnog tužioca Tužilaštva BiH obavlja pripadnik srpskog naroda. Aktuelni glavni tužilac je nedavno imenovan na ovu poziciju kao najuspješniji kandidat, nakon što je tužilac koji je ranije obavljao ovu funkciju podnio ostavku.

Dalje, bez obzira što to nije izričito propisano entitetskim ustavima, prilikom imenovanja u Vrhovni sud Federacije BiH i Vrhovni sud Republike Srpske, kao i Tužilaštvo Federacije BiH i Tužilaštvo Republike Srpske, Vijeće takođe vodi računa da nacionalna pripadnost sudija i tužilaca ovih pravosudnih institucija, odražava popis stanovništva iz 1991. godine, na nivou odgovarajućeg entiteta.

Što se tiče rukovodnih funkcija u pravosudnim institucijama na nivou entiteta Federacije BiH i Republike Srpske (predsjednici vrhovnih sudova, Glavni federalni tužilac i Glavni republički tužilac), u skladu sa entitetskim ustavnim odredbama, od određenih šest funkcija na nivou entiteta, među kojima su i navedne pravosudne funkcije, najviše dvije se mogu popuniti iz reda jednog konstitutivnog naroda ili iz reda ostalih.

U Federaciji Bosne i Hercegovine, iz reda hrvatskog naroda trenutno su na funkciji predsjednik Ustavnog suda FBiH i predsjedavajući Doma naroda FBiH.

U Republici Srpskoj, predsjednik Vrhovnog suda je Hrvat, kao i predsjednik Ustavnog suda RS.

Entitetskim ustavima takođe je propisano da će konstitutivni narodi i pripadnici ostalih biti proporcionalno zastupljeni u kantonalnim, odnosno okružnim, te općinskim, odnosno osnovnim sudovima i takva zastupljenost će odražavati popis stanovništva iz 1991. godine.

Prilikom popunjavanja sudačkih pozicija na navedenim nivoima, Vijeće je vodilo računa da navedene ustavne odredbe budu ispoštovane, analogno primjenjujući ove odredbe i na kantonalna, odnosno okružna tužilaštva.

U vezi sa popunjavanjem rukovodnih funkcija na navedenim nivoima u pravosuđu, Vijeće je nastojalo (i nastoji) da u najvećoj mjeri i tu bude postignut nacionalni balans koji bi odražavao popis stanovništva iz 1991. godine, bez obzira što takva obaveza nije izričito propisana.

Konačno, upućujemo Vas na godišnje izvještaje Vijeća koji se svake godine dostavljaju Parlamentarnoj skupštini Bosne i Hercegovine, a u kojima su navedeni precizni statistički podaci o nacionalnoj strukturi u svim pravosudnim institucijama na teritoriji cijele Bosne i Hercegovine.

Napominjemo da će Godišnji izvještaj Vijeća za 2008. godinu, biti dostavljen Parlamentarnoj skupštini BiH tokom narednog mjeseca, a u kojem se posebno ukazuje na problem primjene ustavnih odredbi koje se odnose na jednaka prava i zastupljenost konstitutivnih naroda i ostalih, sa kojim problemom se Vijeće suočava prilikom

popunjavanja pravosudnih pozicija, zbog pomanjkanja kvalitetnih kandidata iz reda određenog naroda ili iz reda ostalih, potrebnih za određenu poziciju.

U tom smislu, Vijeće u ovom Godišnjem izvještaju daje preporuku i poziva nadležne zakonodavne i izvršne organe vlasti da poduzmu mjere i daju svoj doprinos rješavanju ovog problema, upravo iz razloga zajedničke odgovornosti Visokog sudskog i tužilačkog vijeća BiH i drugih nadležnih institucija za adekvatnu provedbu ustavnih i zakonskih odredbi kojima je regulisana jednakopravnost i proporcionalna zastupljenost konstitutivnih naroda i ostalih u pravosudnim institucijama u BiH.

Nadamo se da izložene informacije pružaju odgovor na postavljeno poslaničko pitanje, napominjući da će Vijeće i dalje ulagati maksimalne napore na usaglašavanju nacionalne zastupljenost imenovanih sudija i tužilaca na svim nivoima u Bosni i Hercegovini, sa rezultatima popisa stanovništva iz 1991. godine.

S poštovanjem,



Milorad Novković

predsjednik Visokog sudskog i tužilačkog vijeća Bosne i Hercegovine